

四庫全書

集部

欽定四庫全書

文苑英華卷二十九

宋 李昉等 編

地類五

日觀賦二首

羣玉山賦一首

海門山賦一首

土積成山賦一首

聚米為山賦二首

禹鑿龍門賦一首

五丁力士開蜀門賦一首

愚公移山賦一首

日觀賦

以千載之統平上去入為韻

丁春澤

大歷十年東都試

登科錄作丁澤

日之升也浴海而麗天嶽之峻也切漢而臨邊登高者
以致九霄之上愛景者欲在萬人之先其所惟一其侶
惟千伊風靈之有載彼日觀之存焉夫其夜刻未終曙
色猶昧彼窮高之極遠此有進而無退未辨昏明斯分
覆載屢聞鳴鴈猶陰沉而不覩忽聽晨雞即瞳矐而可
愛於是漸出暘谷將離地維巖巒既秀草樹生姿氣則

赫視

疑作
絕

人皆仰之其望也如燭其照也無私昔者帝

王御宇立極垂統封禪及此成功巡狩應其春仲莫不
登茲絕頂遐燭大明思煦嫗之義窮造化之精以為日
象一人之德嶽是三公之名信王侯之設險俾夷狄之
來平方今一德無為三光有象動植昭泰神祇盼饗千
岳瑞色思効祉以爰升萬壑春雲欲入封而空上客有
才乏羽儀心思騫翥每積聚螢之志難登望日之處引
領終夕含情達曙如

疑作
知

照燭之有期故躊躇而不去

重曰日有觀兮絕代獨立登之望兮無遠不及何太陽
之至精莫不專於出入

第二

以斜對杳冥中
宵見日為韻

泰嶽東南峯開一室傍接天路低臨曉日陰埋玉兔動
霄漢之微明曉報天雞越氛埃之迫出初其暝色葱籠
懸崖倚空獨出清虛之外遙分莽蒼之中隱霧猶白經
天漸紅披草樹以燈亂耀波濤而血融及夫林嶺寒消
煙雲色變星河寥落以初沒峯巒邈迤而徐見火動山

頂輪移水面穿暗隙以飛鏡歷幽牕而走電至若門宇
蕭條霜空沈寥晴開曙景暖入殘宵揚晶彩以赭赭散
芒角而飄飄露洒文薄風牽影搖觀夫望極天涯生從
地表扶弱木之歷歷出窮陰之杳杳萬壑收暝千巖送
曉消古砌之晴雪動寒庭之宿鳥遙空冷滑傷寸晷之
難留碧嶂峒峒望孤光而漸小拔地生疾騰空影斜氣
亂山燒光分水花絕壁孤危覺靈海之津狹炎輝咫尺
信長安之路賒既而背暘谷以徐來泛圓靈之不礙蒙

水氣以珠暗露松陰而壁碎霞色收錦天風斂黛披雲
闕之斜視豁天門而俯對依蒼乍吐威生齊魯之間過
嶺逾明煦及草茅之內由是遠挂寥落高辭絕溟萬象
焜煌而畢照六龍天矯以無寧安得足踏聳峭手扶青
冥陳白晝之苦短請陽烏之暫停

羣玉山賦

以廓功峻登適
招外遊為韻

喬 潭

穆王與偓佺之倫為玉山之會乃御雲輦張華蓋飛龍
駉駉和鸞噦噦警清蹕傳虛籟忽兮超遙漫若天外於

是乎徙倚西望逶迤北遊梁弱水跨瀛洲析若木以為
珮采琅玕以為羞俾幽荒窮僻有車轍馬跡經銀臺而
右轉肆玉軼以東適停羽儀乎此中觀僊聖之圖籍既
而浮莽蕩躋峻嶒神靈儼其高會容衛紛其上騰若光
若滅賁然來登觀其亭亭太虛不可彌度石室靈造玉
堂天鑿寶牒有融仙經惟錯蕩青簡兮綠字煥瑤緘兮
金絡護以虬龍拂之鸞鶴為列真之策府亦太乙之延
閣覽之而羣聖會同拔之而萬古昭廓且葺書為寶鎮

物為雄小石林之崖峇陋玉樹之青葱赫矚矚高崇崇

秘精義乎其中何必登隱空

按莊子篇登隱
弁之丘當作弁

拜崆峒挹

方壺而訪道歷秦望而為功者哉至如窮地之險極天

之峻疊素九成攢花萬仞非神轡之六駁孰能倏而驟

進或歌之曰彼天子兮塵外鑣登靈臺兮意飄飄吾君

得道兮異於是不日求兮自逍遙以石渠為羣玉之處

幸校文之見招

海門山賦

以峭立如門
古無易為韻

周

鉞

一作
鉞

大壑天接雙山闕如作鎮而魏我對峙象門而中外皆
虛坼萬仞於長霄共持神秀納八紘之積水開閉靈居
合沓龍蟠連延壁立懸崖嶄萃而不動駭水喧虺而自
急每使盈虧之月向裏升沉能令早暮之潮由茲出入
故得周天柱作海門峻軋空碧高城混元奔疊浪而若
容車馬拔跳巒而似列藩垣當晴晝而纖露豁開一作明
大吞江漢值陰霾而濃雲交翳暗鏤乾坤外布雄稜內
施巖嶠波聲相切以澎湃山狀並分而竦峭呀吳呻越

揔舟楫之隄防發電興雷轄魚龍之衝要岌岌崇崇橫
西截東風濤莫犯乎永固天地將齊乎不終况乎據是
水德鑿非禹功海若抱闕於其側陽侯擊柝乎其中彼
岱輿因顛頊漂流太行為愚公遷易一則屹要道而徒
在一則滔洪波而何適未若是山也專百靈捍禦表羣
聖光宅吐晴虹以為楣森古木以成戟故能咽喉水府
掩映仙都長鯨透而謂呈魚鑰曉日照而疑啓金鋪以
嶽而言巡八州而何有以門而一作視指三海而則無

異乎勢壓坤維氣連淮浦作巨浸含弘之間為百谷委
輸之戶所以知開闢之玄功豈止亘億齡而窮萬古

土積成山賦

以貴其不已成
此崇高為韻

彼山之峻兮稟氣而成此山之峻兮積壤所營何人功
之彙聚致丘壑之崢嶸始假一杯已見進吾於徃終成
九仞還宜景行而行當其率性作勞因高立址將覆篲
而可久念極天而有俟道既長而彌專力雖勤而未已
於是資地勢建土功區區而日不暇給矻矻而樂在其

中以不拒物為心因成高大以不讓座為德遂致宮崇
所謂從微而至著有感而必通致峯巒而因人立跡倅
造化而與古爭雄故得日就月將天長地久小既資於
坎窞大豈遺於培塿匪辭形倦將欲必致於雲霄所異
道成亦以兼容之妍一作奸不有始有卒乃勤乃勞依依
漸長日日增高以力為謀比大不唯於熊耳將勤喻學
成功豈謝於牛毛是謂積小以稱竒裒多而為貴既稠
疊於委輸亦縱橫於經緯則聚米者故不足云累臺者

於斯殊未所以塊然凝質萃爾成姿千峯可數五色無遺以此驗巨靈之神誠為怪也以此想愚公之事亦可凄其別有十載施勞三冬率是常負荷以相勉每勤求而自揣所冀必成無虞中毀僮若因我而出雲庶亦降神而在此

聚米為山賦

以習知山川之險易為韻

蔣防

至精者米至大者山伊巧心之可化諒措手之非艱始聚之時雖未離乎掌握象成之後若可極於躋攀昔馬

援以炎徼未賓雄圖是急爰請兵以薄伐將越險而深
入懼君意之未明陳地形之久習既而辨襟帶分郡邑
雖蠻貊千里亦可圍於寸眸罔巒萬重誠不過於數粒
方高高而仰止異屑屑而俯拾遠近忽其豆分東西俄
而玉立寫載既宣規模罔憊雪峯競聳雲嶺交連初疑
栖畝之糧尚班于地漸似如坻之庾欲峻于天笑覆篲
之難進訝高陵之遽遷起自纖微有類積塵為嶽終非
竒幻那同畫地成川且堅而不動者山之常遠而可識

者人之智既分銖於忖度得道路之險詖所謂喻大於
微圖難於易事非同於積累跡豈涉夫詐偽故得戶牖
不窺要荒可知積廩於增麗因陳而究竒縮地勢於撮
土之間孰云見小備山形於握粟之內何慮功虧近可
得而立驗遠無勞於坐馳經營若神不媿巨靈之跡融
結隨意將符真宰之規至矣哉曲盡人謀詳觀地險非
羣玉而玉彩爭光異落星而星芒亂點然後師干可試
隘害可期不假斗筭之筭因成指畫之資念彼愚公誰

肯與其進也微夫良將吾當學以聚之

第二

以明知險易冠
敵成擒為韻

獨孤鉉

有山負固兮遠不可窺規模之於米兮了然可知象在
其中則遠而視近積而能散故高以就卑所以舉一隅
而必狀投一溢而增危峙乃糗糧始覲必盈之積塵其
糠粃俄分不讓之為爰將取法非曰作偽初識聚米之
夫及為樂山之智同遠近無拔蛇之患殊輕重去壓卵
之易善於陣者謂我幄內師謀昧於事者謂我軍前兒

戲於是高卑殊狀巖壑丹闕爰分杵臼之資寫彼丘陵
之積持一撮之多謂能作固迷方寸之地已疑見敵操
量鼓者早訝於拔山充糜粥者旋驚其茹石若其似朽
疑駭如呀欲平防之於十手所指負之於五斗而盈無
還三十之車侔於造化酷似五千之仞勢亦崇成且夫
廩以筭藏域疑箕歛搜其存峯之實屹作捍邦之險削
培塿而敝帚呈功吐嶽岑兮括囊未掩於是太白忽峙
玉山宛呈蔽持兮陰靈乍泄轉捧兮雲掌俄生偕病馬

之岡莫知其遠指亡羊之路不見而明然以小方大布
新除舊有懷狗盜之虞無辭蟻壤之漏爰謀爰度方同
數米之人為岡為陵不是傾倉之寇是知進退由己高
下在心克盡崇卑之勢難均筭斗之斟勿謂君前嘗巧
事外求音功早登於九仞寇何逃於七擒

禹鑿龍門賦

以利濟生人功
存聖德為韻

陳山甫

控引河源鑿山為門闢兩崖而龍蟠虎踞飛一帶而電
激雷奔所以極疑作流離於品物佐含育於乾坤邈矣

而高蹤斯在巍然而詭狀斯存昔夏王披簡援圖盡力
溝洫萬方附會以恭命百工子來而奉職畚鍤具而勢
蹙風雲巖岫分而狀成閭閻波濤有路無非汲引之功
鱗介攸居咸被生成之德異夫屹爾崖巘張為閉閣懸
流赴勢以中注巨石乘危而下傾拉藪林而山靈叶贊
迴大壑而水恠奔驚故凝滯者得以流其惡昏墊者得
以厚其生當其相地所宜兆人攸利山崢嶸而洞啓水
噴薄而俄至湯湯浩浩俱成畎澮之流原隰陂池皆為

生植之地道邁前古芳流後塵豈不以開濟之功莫大
通流之用如神龍躍新渚魚迷舊津四載之勞終成於
舜日九年之患空媿於堯人始也設以規模不資鈴一作

鈴

閉雲橫結駟之狀浪走高車之勢廣濫觴之運水無
不通裨造化之遺人無不濟茂績崇崇與流無窮豁岿
堯而分遠碧來浩渺而寫晴虹不愧錫珪之命寧慙拓
土之功是以義軒等美唐虞齊盛故當輝燦於帝圖不
然何以應千年之聖

五丁力士開蜀門賦

以蠻國扉開遂
通人俗為韻

陳山甫

伊山為蜀是曰蠻俗惟天俾秦厥生神人拔長蛇而顛
顛闢廣岫之嶙峋在昔褒斜未通荒焚異域彼為夷國
物產難究封疆罕測秦將欲廣其南冠其北張儀於是
度其勢量其力假牛之計斯設饋女之功是克蜀王乃
命力士闢高山貪功饗養志疑作情險難疑作捫峯巒
於日側扶虺蜮於雲間將以砥慚崒等濟攀振衣而力
抗千嶂攘臂而威陵八蠻俄而白日蕩搖玄天忽霍鬼

哭神怨風號霧廓怒髮森植雄心震躍灑珠汗以電散
瞪星眸而電落將欲斷煙靄排崑崙謂巨靈之所拓蹂
重林迴絕壑疑夏后之所鑿吁可畏哉碑轟若雷虎視
五嶽鯨吞九垓徒見其豁若谷喘若堆橫隱嶙直崔嵬
大應心踣高隨手摧江標峻機之形呀然地裂闕鬪高
峯之色駭若天開已而後患方啓前心莫遂喧闐兮乍
進秦卒遷迤而全收蜀地道路無阻關梁有備聞五丁
死而蠻黨移一逕通而秦人至雖共工之勇將觸也非

雄雖項藉之力將拔也寧同曾未若擘秀嶺駭蒼穹今
古攸賴華夷是通羽毛讐死以填谷草樹驚推而墮空
遂使鞭石之帝移山之公壯志難奪莫不慕其英風

愚公移山賦

丘鴻漸

止萬物者艮會萬靈者人艮為山以設險人體道以通
神是知山之大人之心亦大故可以議其利害也昔太
行聳峙王屋作固千巖糾紛萬仞迴互冰霜蓄而居夏
凝結源流聯而飛泉積素爰有諄諄愚叟面茲林麓愴

彼居之湫隘懲祁寒之慘毒激老氏之志且欲移山當
筭亥之年寧憂就木乃言日月無私照也山則蔽之春
夏無伏陰也山則蔽之傾阻我比屋擁隔我通達我將
拔本塞源使無子遺得則為功之美否則為身之恥終
當貽厥孫謀施於翼子於是協室而一乃心力荷擔而
三夫傑起畚斯備其功聿修于澗于沼爰始爰謀一
之日土墾石鑿二之日崩崖隕斲三之日夷峯彌壑雲
林摧以蓋偃火石迸而星落爾其洞突堙塞陰陽以

衍

交錯飛禽走獸魄褫氣懾而不復巢居穴託王喬偃佺
低徊頻蹙而無所駭驚駕鶴山神操蛇聞之乃壯其功
深其計將懼不已先謁于帝命夸娥二子發神威振猛
厲始將怒目決眚終欲颺舉電逝遂乃幹礪斧挾崔嵬
下拔乎三泉上衝乎九垓突兀雲動磅礴天迴遽投雍
朔而不復來世人始知愚公之遠大未可測已夸娥之
神力何其壯哉儻若不收遺男之助荷疑從智叟之辨
則居當困蒙往必遇蹇終為丈夫之淺今者移山之功

既已成河異之地又以平則愚公之道行客有感而歎
曰事雖殊致理或相假多岐在於亡羊齊物同於指馬
我修詞而忘倦彼移山之不捨吾亦安知夫無成與有
成諒歸功於大治

文苑英華卷二十九

欽定四庫全書

文苑英華卷三十

宋 李昉等 編

地類六

林表吳岫微賦一首 大孤山賦一首

窻中列遠岫賦一首 山呼萬歲賦二首

沃焦山賦二首

林表吳岫微賦

冷朝陽

楚江之陰巖壑重深參差遠岫掩映遙林帶殘霞之隱

隱含暮景之沉沉聳孤峰之萬仞擢喬木於千尋仰之
彌高倚青冥而直上瞻之彌遠凝黛色而傍臨窻微明
而可見雲出沒而無心微雨新晴陽烏乍曉芊芊芳樹
歷歷飛鳥森羅廣澤之間半出重林之表天高地遠混
煙靄而雖微虎踞龍盤等衡巫而不小形標迥漢勢壓
全吳衆鳥所託羣仙所趨林隔岫而相映岫依林以相
扶幽蘭所生知其芳矣仁者所樂不亦悅乎春思感於
春林遠情馳於遠岫心悠悠以遐想色遙遙而層構度

材任土挺翹楚而敷榮蘊玉藏珍分巘嶸而增秀信乾
坤之覆載承雨露之繁茂當峻極於長空豈蔽虧於側
陋蘭青青兮雨霏霏望鄉路兮吳山微折芳懷遠兮送
將歸桂枝片玉兮生光輝

大孤山賦

并序

李德裕

余剖符淮甸道出蠡澤屬江天清霽千里無波點大孤
於中流昇旭景一作日於匡阜不因佐官豈遂斯遊謝康
樂尤好山水嘗居此地竟闕詞賦其故何哉彼孤嶼亂

流非可儔匹因為小賦以寄友朋

川瀆熾道人心所惡必有穹石禦其橫驚勢莫狀於灑

灑

蘇軾灑灑賦其本此乎抑偶合也

氣莫雄於砥柱惟大孤之角立掩

二山而傑豎高標九派之衝以捍百川之注耽若虎視

蝨

一作蝨

如龍據靡搖巨浪神明之所扶不倚羣山上玄

之所固彼邈迤而何多信巖然而有數念前世之獨立

知君子之難遇如介石者袁楊制橫流者李杜觀其側

秀靈草旁挺竒樹寧憂梓匠之斤豈有樵人之路想江

妃之乍遊疑水仙之所或一作駐嗟瀛洲與方丈蓋髣髴
如煙霧據神鰲而脆脆逐風濤而沿沂未若根連坤軸
終古而長存迹寄夜川負之而不去雖愚叟之復生焉
能移其咫尺

窓中列遠岫賦

以山遠而見如
在諸掌為韻

張仲素

仁者靜而自閒高其居而閉其闕爰開窓以列岫若施
障而圖山邈彼黛巘當於其間至若虛牖洞開連峰向
晚雲無心而迥出鳥厲翼而孤返初疑鏡裏覺萬象之

俱深又似壺中見三山之尚遠洎如雨歇原野風開薄

惟天道不窺而自見山光遙麗而增思謝守臨齋以觀

詠之不足陶公開卷則知室是遠而若薜蘿之在眼見靈

運方坐嘯而搗頤杳杳雲峰既自中而翫矣蒼蒼海嶠

亦孔昭而見之况復彩翠之容朝昏是變將避俗以無

悶殊近知而一作守見簾光乍入增松雪之微明砌竹

旁垂助林巒之葱蒨夫其窓也或飾之以青瑣交之以

綺疏想取榮於爾室非助境於吾廬鑿垣而疊嶂送列

寓目而幽襟必舒偶琴酒之樂只泯色空之豁如且彼
植木翫芳者有時而改累土為山者有時而殆曷若曲
肱隱几事幽功倍垂碧紗而嵐氣共凝卷宿霧而翠屏
常在是知事有親而逾失遠而匪踈狗利爭先之徒固
難知也逃名小隱之士或近沽諸亦何必尋赤城之標
究蓮峰之掌彼垂堂而是冒此自牖而可賞山中人兮
誠不在於獨往

山呼萬歲賦

以大君升中維
嶽表祥為韻

張仲素

天作太室巍乎蒼蒼立極正位含精降祥惟漢武之肇
祀聞嘉言之孔彰告盈數以不忒鬱希聲之載揚於時
五輅既臻千官畢會望嶄巖之絕壁升縹緲之華蓋排
羽衛於山前刻金石於天外諒精誠之至感致天地之
交泰於是騰洪音流翠靄始則類乎雷殷終不因於地
籟惟天祚聖谷得一而盈惟嶽降神聲至三而大夫其
登封則千古是追峻極而四方是維瑞載光於漢史德
且詠於周詩動合休徵有異坻頽之震響合靈祀且殊

大塊之噫是時也百神受職萬靈獻功霽山霧收山風
福穰穰於宇內聲隱隱於封中且啟迪之微延洪是表
因勒成而響答殊卜祝之占兆憑乎物陋石言之不減
錫自天歎亭齡之尚少懿乎習合散乎網緼邈崇丘之
杳靄伊仰止而敷聞掩龜格與鳳降軼神光與慶雲獨
得乎數千百祀何慙於七十二君稽彼衆山咨夫四嶽
或泥金於杳靄或瘞玉於綿邈封並聞夫再三響未効
於清濁方今文物芬郁寰瀛廓澄我后克讓謙勤夙興

已効如山之壽式當如日之升所以下臣獻頌望翠華
之是登

第二

以聖德潛融陰
靈效祉為韻

韓 鉉

嶽則降神君惟作聖爰膺萬壽之福以奉一人之慶至
誠斯感瑞既發於希聲盈數足徵道方期於永命伊昔
漢德方至神人以寧展升中之盛禮備昭報之天經休
徵是格明德斯馨帝道昌而言作天心啟而昭靈諒惟
恍而惟惚覺非雷而非霆若自觀心數已超於卜祝匪

因騰口事全過於夢齡曾異石言方承帝祉人君肅穆
以傾聽羣后左右而驚視訝寂寂以無人每洋洋而在
耳數惟萬式彰悠久之期呼至三用表丁寧之旨瞻彼
維嵩極天比崇明神是處應感潛通降喜聲於碧嶂遵
密命於玄穹慶彼盛時巖嶺且聞於隱隱暢茲和氣人
心盡樂於融融天既輔於無親神方降於有德在盼嚮
而昭異裨聲明而莫測孰謂乎不識不知曷昭夫或語
或默懿其發茲大號騰彼弘音做谷神之虛宅振山水

之高林周流崖巘散越嶽峯和清風之遠韻凝翠靄之
層陰若非報地承天恪慎克孝洋溢乎德澤布濩乎聲
教則何以跡追三五之蹤歲表十千之效囂然震盪忽
爾沉潛儼翠華而將下仰太室而迴瞻至矣哉斯前代
之盛事惟我后之能兼

沃焦山賦

吳融

域中公子問於方外先生曰蓋聞水之大也下環乎地
上浮於空無象無邊夷猶洪濛百派千流皆歸於東何

巨溟之深也萬古能容何九州之高也不淪其中先生
曰渾沌死乾坤始東西傾川澤委帝乃慮海旁溢俾山
中峙復孕以火用銷其水此沃焦之為義真宰之玄旨
者也請言其狀也巉乎萃乎赫曦乎翕翕乎陰陽熾炭
天地開鑪景風鼓吹赤帝規模成於妙有拔彼虛無處
冷能熱雖燔且濡於律則黃鍾取法在易則既濟相符
坡崦一作
陔兮壓海萬里鴻洞兮烘天一隅液馮夷軋天
吳鱗介既難以潛伏草木安得其芬敷巨靈不能擘畏

其爛手愚公不能移憚其焚軀靈漲疑竭大室若枯爾其水之來也浩浩爭奔滔滔不住蹴嶽推阜跳天沃霧賜谷無地扶桑失樹雷奔潮走雪飛沫聚吞吐造化浮

沉朝暮一歸塘

列子渤海東有大壑實無底之谷名曰歸墟初學記作歸塘

之積積

既久而還盈一尾閭之洩洩不供而旋住苟彼不為煎熬何物當其委輸公子曰夫萬物之是非也當務所見無矜所傳不見五嶽各司一邊蟠地極天吐雲含煙玉石產其下豫章森其巔高高下下綿綿聯聯方面是傳

祀典是先故無事則備王者之巡遊焉有事則為國家之闔防焉彼沃焦者存耶亡耶不知夫去中國幾千其說何邇其功豈然先生曰古不可以今論遠不可以近識至於先賢先聖有功有德或始火化或始粒食或衣裳兆民或棟宇萬國其人豈見其道何極但日用而不知固神化之難測抑又人之為意見頻則不恠聞數則不驚只如跋烏玄兔迭代虧盈迅雷烈風無形有聲北冰不泮南雨無晴方諸向月而水出陽燧映日而火生

鵠知半夜雞辨五更螟蛉化而螺贏負洛鐘鳴而蜀山
傾譚如詭妄驗乃彰明儻非目擊皆必力爭如沃焦者
茫茫靄靄存於物外屹溟漲以獨立無丘陵之相帶何
地能勝惟天粗蓋堯災是弭禹功是賴但以遠而不見
貴以近而不見大何異乎曾參冠百行之首出四科而
不載姬旦有再造之功為三監之相害有以見深藏若
虛明道若昧只如高稱日觀靈號天孫魯瞻所重究鎮
攸尊能攻善惡業召精魂何盜跖壽而幸何顏回夭而

究何富慶何貧原靈獸出何遭羈縻之困海鳥來何獲
鐘鼓之喧觀其倒置孰為司存又如太華隱嶙上五千
仞碧蓮若插高掌如奮然而設關太束為城太峻苟一
夫可守四塞可鎮終使險易恃而固易憑而今驕易生
而荒易徇懼則能安逸則成釁又如嵐浮紫蓋秀擢朱
陵北渚下壓南箕上承然而聚鬱蒸限嚴凝鴈不可度
人何以登其禍聖賢也則帝舜之遊不返昭王之死無
憑其殃忠謹也靈均有葬魚之痛賈誼有占鵬之徵是

非不辨正直何稱徒聞金簡玉書以為貺九向九背而
自矜又如幽并之墟畢昴之位岢崑直上磊落相次然
而蔽趙符於上成無恤之不義產燕璧於中假慕容之

神器大蛇蜿蜿兩頭何異嘉穀疑疑五穫何利

管子慎
山有穀

四種
五穫

旁扶跋扈之黨坐索彤弓之賜胡不懲革而令馴

致又如據天地之中央潤河洛之流光岢亭壁立壓疊
屏張而能降神表瑞呼歲呈祥控臨諸夏標準四方若
乃陳蕃竇武一時忠良為國除害其謀乃臧不獲天助

翻為賊戕劉聰劉曜恣意焚傷衣冠草莽宮闕荒涼俯
折地軸仰絕乾綱漢陽九以遽畢晉南渡而尋亡曾何
固護自倚青蒼月裏開宮但容童子雲中捻管唯引鳳
凰吁其咄哉彼五嶽者長未一分短以盈尺論名則大
責實何益封公封王用珪用璧邃宇崇館朱殷粉白然
識者視之何異沐猴而冠牽牛負輓者耶其次則有非
方非嶽亦恠亦神崑崙則樹珠田芝蓬萊則闕金臺銀
周王迷之於轍迹漢帝感之以禮裡荆山美玉獻不遇

君隴山鸚鵡語或陷人嶰谷有竹慘舒不均嶧陽有桐
清濁強分姑射何靈如冰如雪巫陽何感為雨為雲恠
山何恠飛來至越慶山何慶湧出於秦若然則遠者近
者大者小者如沃焦之功實冠於天下何以名耶至於
南面巍巍安尊定卑建邦設都來蠻走夷其為武也有
干戚鈇鉞其為文也有俎豆尊彝齊紈越絮暖必如斯
周禾溫麥飽必以時胎化卵育手捉足馳其奉生也有
歌鐘管籥其事死也有棺槨幌帷詒子詒孫固本崇基

苟懷襄之不止皆墊溺以何之若然者不惟九土潰而
全墮抑亦三光蕩而崩離則堯舜禹湯之道沒不傳矣
周孔揚孟之文又安存斯况乃上無灌木誘良工之斤
鑿下無靈鰲魚招巨人之釣索不棲翠羽飾綺被之彩錯
不孕明珠供魏車之照灼不滋金鐵起兵交惡不穴鱷
鯨吞舟恣虐吉凶莫知威福寧作誰銜盼饗誰感冥冥
所以貞珉翠琰却絕罔錄桂湯蘭肴何嘗約畧固不復
邀物以白犬白雞媚人以靈草靈藥但超世以崔嵬為

普天之銷鑠於是公子愕然如失起而謝曰儵忽之神能鑿人耳目俞盧之術善治人膏肓向者聞衆人之論浩然若涉津之無梁今也聞吾子之論燿然若披雲霧而覩太陽恨不能凌風雲乘混茫決意極觀勒銘其旁噫有名之祀所在感彰至於山魅射影水弩為創鴟夷鼓怒耕父激揚皆霑沃酹不乏馨香何茲山也橫絕於萬代不遇於百王將無時如孔子豈獨行於務光近者泰階未平四郊多壘貳負尚活三苗未死水仙則多陷

齊人米賤

疑作賊

則半驅妖鬼室散機杼田拋耒耜卽官

困採椽於野將卒貧鬻薪於市霧足妖興雲多陣起既
走羣望猶懸帝祉豈褒崇之漏彼致災害之如此方今
封有功而爵有德小不遺而大寧弛蓋九重深執事者
未聞於天子

第二

以蕩熱翻空此
馬銷鑠為韻

海之大也吞乎百川百川不停也海將溢焉伊元化之
相制屹崇山之暗然不知乎何化

疑作代

疑結沉潛積熱

廣陂陲高截嶽焰止不死煙生莫絕瞳矐兮想二氣之

爐中烈

一作熾

沸渭兮疑九州之鼎下熱當長鯨之鼓跳

此歟爾以潛銷雖巨鰲之噴躍亦倏然而盡鑠滲若一

空呀如四涸得非火井通其腹且孰問其穿鑿當是燭


龍蟠其根又誰睹其照灼但耗溟渤自橫寥廓莫不屹

屹崇崇燭虛燥空向曙而晴霞助赫連宵而陰火相烘

如欲以焮鮫室災龍宮雨露既難以澤草木安得而豐

遂使乘槎之人莫敢沿洄其側銜石之鳥無因棲息於

中是知陰陽之變也。本自相形動靜之用也。歸於相養。苟喬岫之無作。則柔祇而必蕩。若然者。堯之水不止乎。九年之多。禹之功難均乎。四海之廣。彼稱神。稱仙者。有十洲之繁。封公封王者。有五嶽之尊。縹緲而雲霓自鑠。崢嶸而日月爭翻。徒充覆載。莫補乾坤。曾未如千仞獨高。衆流皆委。非煎熬之不息。則墊溺而何弭。所在雖遠。厥功難弛。有能光祀典於吾唐。宜褒崇於此。



文苑英華卷三十

欽定四庫全書

集部

文苑英華卷三十一至
六

詳校官內閣學士臣瑞保

助教臣常循覆勘

總校官進士臣朱鈐

校對官編修臣秦泉

謄錄監生臣任作乂

欽定四庫全書

文苑英華卷三十一

宋 李昉等 編

地類七

古石賦一首

石賦一首

落星石賦一首

昆明池石鯨賦一首

禎石賦一首

仙石靈臺賦一首

石鏡賦二首

望夫化為石賦一首

溜穿石賦二首

古石賦

鄭惟忠

博望侯周遊天下歷覽山川尋長河於異域得美石而獻焉漢武帝未之竒也東方朔見而喟然曰此石英輝潤密秀色明爛舊枕昆吾之谿曾臨歸美之岸玉雉飛而激矢金雞鳴而縱彈至如天台始裂地乳初分丹青孕彩隱起成文盈尺則內含明月膚寸則外吐浮雲別有兩楹分竦雙闕相向依依識啓母之形亭亭表望夫之狀鼓迎桴而若動帆映舟而似颺此並流膏曲澗滴

髓危峰據谷成虎臨池作龍鋪英九節連葉千重若乃
泗水之上岐山之側撫之則磬動竒音被之則錦開新
色匠石見而驚駭師涓聞而歎息於是琢磨成狀雕瑩
生輝似龜則負圖盤峙如鵲則緘印騫飛在地者佳人
擣練登天者織女支機及其火烈崑墟星流宋國被隕
形碎遭焚影黑碑沉郢路之東柱折陽關之北昔之開
壇竹聳抱劔松抽礎應山雲之潤橋通海水之流柳谷
岸崩之馬鬱林泥落之牛莫不歲月凋訛丘陵蕪沒顛

墜坑弃枕倚巖窟據洞口而差莪出泉心而砑硃徒見
新排理坼舊感文迴圓分者電散方裂者冰開既藏瑕
而被蘚又抱穴以侵苔豈如寫鏡能明磨鋒可利擊拊
充帝庭之樂關和覩王府之器總五色而補天舍九光
而鎮地者矣詞未畢帝乃顧而言曰楚王見璞棄之山
阿不有卞氏其如玉何抽琴命操為古石之歌歌曰江
東藏瑞簡濟北蘊兵書若非平固湖中鴈定是昆明池
裏魚歌響既終神儀有懌左右驚視符彩傍射使玉人

而攻之果得連城之壁

石賦

李邕

代有遠遊子植杖大野周目層巖覩巨石而歎曰茲盤
礪也可用武而轉乎茲峭峙也可騰趨而登乎觀其陵
雲挿峰隱霄橫嶂峻削標表汗漫儀狀劃鎮地以周博
崛戴天而雄壯默玄雲之暮起赭丹霞之朝上若使轟
布長城疑聯高壁遏西戎而分塞截東胡而度磧張九
州之地險廢四夷之天隔固可以眇絕驕子遐阻勅敵

歸華夏之甲士却邊荒之羽檄別有列在王庭地當文
砌疑貞琬之粉澤艷重錦之光麗承聽政之梁柱納進
賢之階陞匪徒夾植桃李因芳蒞蕙降神女之徜徉拂
仙衣之容曳若乃苔蘚剝落雨露淋漓水碧藻曜繪畫
紛披不邀代之所貴不欲人之見知罔懷金而則異曷
剖玉而方竒至若危堞孤援懸門禦衝出陣摧鶴乘城
起龍砲與矢而飛雨磁當途而列墉金鼓爲之沮氣戈
矛爲之輟鋒借如奕秋沉思蜀相興圖秉節制以全勝

縱劫殺以論都鄙宋緘之謬識嘉禹鑿之神模落五星
而多惜坐十人而不孤惟磨礱之所取任圓方之自殊
支空留於織室編尚想於兵符烏何恨而填海山何言
而望夫徒以貞者不黷堅者可久臥如羊於山野蹲似
虎於林藪知作鼓之希聲信爲人之無偶梁架海以東
住一作注鎮臨江而南守庶投水而克成將補天而何有
豈獨砥礪利器盤踞真王鏃來肅慎門通越裳屹特立
以興主駕能言以發祥邇聞疑作開蓮兮表華遠倚劒兮

疏梁保茲城而永固結彼交而不忘何止藏書入室勒
篆離經翕湘川之飛燕伏昆池之駭鯨膏久服而顏駐
碑一觀而涕零豈如扣角匡坐且悲歌於白水尋山小
住止危途於翠屏而已哉

落星石賦

崔沔

元氣初變有形既闢稟清明之表者騰為星辰受重濁
之資一作姿者降為土石肇經綸於邃古蓋常久而不易
詭哉靈物爰始混成叅夫玄象麗於太清彼在天也何

謹奄淪落於邊城其在地也何幸復推遷於上京爾其
蘭臺廣廡芸閣脩除飛軒廓落邃宇崇虛芳草旖旎珍
木扶疎邇九重之宮闕藏萬古之圖書地禁務簡政和
禮舒貞而不黷其清有餘意棲閒之得所形一作雖變化
其焉如徒觀其隱淪晶昭疑畜縮光芒體硤以難動
氣埋冥而不揚擬於規矩既不合於圓方徵其彩飾又
無復於玄黃匪處匪出不識於行藏匪榮匪悴不達於
炎涼夫其靜也何必徐生百祥夫其重也何必能鎮百

殃廢永終而知弊蓋抱璞而襲常彼無用也亦至人之所謂允臧

昆明池石鯨賦

李子卿

漢武帝將恢厥功闕

一作闕

厥土使近必伏遠必取乃象

滇河以爲池法昆明而教武於是水物備石鯨吐茸鱗
鏤甲欲動於漣漪掉尾建鬣必隨於風雨殘文沙白古
色苔蒼若噴沫而生浪狀銜珠而有光質惟其堅豈有
時而泐感則斯應蓋動惟其常方將協靈德薦禎祥豈

泥沉而沙臥與地久而天長者哉至若漢苑風霽秦渚
流春輕搖澹汙稍動淵淪載沉載浮百尺且窺於頌首
若明若滅兩崖猶認於文鱗對牛女而光動映樓船而
色新誇大豈慙於海客遇屯空笑於波臣及乎雷隱南
山雲生北斗鼓怒波擊崩騰水走勢則淘淘疑作淘淘有類
陽侯之振聲乃虬虬宛是蒲牢之吼若此則非不知靈
之所憑神之所有者也且石之為質也磨而不磷魚之
為物也動而必順豈比夫為犀蜀郡浦際空沉作燕湘

川雨中方振色映乎崖渚性合乎風雷非任子之釣得
儻琴高之御來幸見處於河漢亦何辭於劫灰客有感
而言曰今失流無虞鏗鐘何託請爲不轉之志以就觀
濠之樂儻南溟之可圖吾固知夫後時之可以潛躍也

禎石賦

以素質玄字篆
隸相參爲韻

薛存誠

上帝乃眷下顧豐我皇祚產禎石以報德約遠人以遐
赴外輝煥以發章內清明而含素方圓冰潔篆隸星布
五千符聖歷之長一九合太陽之數瑩然非追琢所及

忽爾若神靈來附考乎文也知諸受命之期徵乎石焉
示此維城之固且夫文旌乎實石堅乎質垂本根以繁
茂作元后之貞吉驗符而天命有歸貽慶而孫謀莫失
方洛書以自來狀河圖之負出懿夫爍彩發鮮隱起成
妍質非工斲字乃神鑄移篆文於玉璽之上取隸則於
銅棺之前紛鳥迹以屈漢若飛騰而在泉帝拜昌言慶
實延於卜代名傳聖運功何異於補天苟不思而來暨
恭承眷於上玄信乎瑞以勤致彰乎天賜其爲后也貴

乎無得而稱其為石也下乃不求而致豈比夫涓濱之
璜兮空言佐命峴首之碑兮永沉文字孰若我垂吉祚
於當時演昌期於後嗣且乎文可嘉而不可卷石可固
而不可轉題八角而爾乃增輝刻九言而吾斯盡善宜
子孫之螭螭得先銜於篆隸太宗勞謙垂制虔告上帝
伊連被而莫紀自高祖而流裔其石也為遐玉之祥惟
孤也實先君之系誠降慶之所致敢欺給於輿隸於是
公卿列辟劔佩鏘鏘聯趨詣石再拜稱觴斯萬人之有

慶表二聖之重光不然何炫發於石玉侔其相瑩疑煌
無點璀璨有章帝曰祖考之德惟覃股肱之能以參故
天錫之罔替諒不穀而何堪

仙石靈臺賦

惟神化之所感何禎祥而必臻位將天而同德天與日
而共新百靈扶於三善萬象資乎一人美以疑英聲遠
被嘉貺必陳於是祕其迹則如畫如隱圖其文則匪鐫
匪刻屈若絲縈舒同髮直彩非因染辭無假飾雖真錄

之可觀固神功之靡測若乃烟消字發苔落文生映月
波起含日金明彰八十之綿祚著三代之珍名或鸞迴
而鳳轉乍雲點而霜橫法兼篆籀體備形聲信天筆之
攸假實神翰之所成至如桂影宵臨星光夜燭分若珠
解連同瓊續映斯疑作朝霞以散錦流夕露以垂玉紀三
皇之故事包五代之遺躅足使濁河龍泳清洛龜沉旣
超前而冠後亦挾古而光今所以管絃流韻鐘石凝音
豈獨妙符至理固亦道叶乾心總羣瑞以考徵實表盛

乎貞紀騰茂實於千載激清流乎萬祀玄象煥以呈祥
靈山鬱以効祉明皇期一作基之永固與天地乎終始嗟
微臣之菲薄屬欽明於暮齒望天闕以長謠情顧戀其
何已也

石鏡賦

以清光內朗栗
之媚然爲韻

李程

惟石之貞惟鏡之清鏡因石以爲異石假鏡而爲名其
在石焉肇自一拳之質其爲鏡也非因百鍊之精不資
磨瑩而冰淨詎假雕鐫而砥平徒美夫孕清瑩含彩綴

粲玉質以皎晶蓄霜華而明媚匪因人力其成也何時
倬彼神功其來也奚自凝輝炯炯散彩洋洋既不勞乎
鎔範亦無失於圓方輝映空巖恒舞山雞之影色澄清
夜寧慙玉兔之光伊鑒物之必審信自然之所稟彼虛
受而不遺同至道之無私既不限於遐邇豈有差於毫
釐深山之中誰辨藏冰之處幽谷之際寧分抵璧之時
况剛直其體清貞自持恒發輝山之色常含韞玉之姿
懷寧一之心不可轉也處闐寂之地誰其尸之當六合

之精爽澄素輝之潔朗可以坐致於雲霄可以立分於
颯颯知遠之邇視山岳之在目以小觀大覽江湖如指
掌且鏡之爲物也淨石之爲義也堅旣守質以固矣亦
騰光而皓然朗鑒之前皆願呈其肝膽委照之下終願
辨乎媼妍故能無幽不燭無物不載彼三光與萬類莫
不形乎其內也哉

望夫化爲石賦

以望遠思深質
隨神變爲韻

白行簡

至堅者石最靈者人何精誠之所感忽變化而如神離

思無窮已極傷春之目貞心彌固俄成可轉之身原夫
念遠增懷憑高流眇心搖搖而有待目眇眇而不見絲
蘿無託難立節以自持金石比堅故推誠而遂變徒觀
夫其形未泐其怨則深介然而凝類夫啓母之狀確乎
不拔堅於王霸之心口也不言腹分則實形落落以孤
立勢亭亭而迥出化輕裙於五色獨認羅衣變纖手於
一拳已迷紈質矧乎石以表其貞變以彰其異結千里
之怨望含萬里之幽思綠雲朝觸拂我我之髻鬟微雨

暮靄洒漣漣之珠淚雜霜華於臉粉脫苔點於眉翠昔
居人代雖云賦命在天今化山椒可謂成形於地於是
感其事察其宜採靡蕪之芳生不相見化芙蓉之質死
不相隨冀同穴於冥漠成終天之別離則知行高者其
感深跡異者其致遠委碧峰之窈窕辭紅樓之婉婉下
山有路初期携手同歸窺戶無人終歎往而不返嗟乎
貞志可嘉高節惟亮同胚渾之凝結異追琢而成狀孤
烟不散若襲香於爐峯之前圓月斜臨似對鏡於廬山

之上形委化而已久目凝睇而猶望悲夫思婦與行人
莫不覩之而惆悵

溜穿石賦

以能以甚柔而
攻至堅爲韻

趙蕃

山溜泠然漱幽石而濺濺恒慕歷以迸集忽嵌空而下
穿介若自持謂稟靈而利物呀而中斷見積小以摧堅
且其輕重異源剛柔殊類嘉洞出而無朕知累功而有
自貫白雲之幽抱滴滴方來破蒼苔之古痕泠泠斯至
崎嶇莫狀激射無窮逗跳沫以居內洩涓流而在中日

就月將必漸然而爭

一作自

赴因微方著殊異

疑作者易

者之

先攻原乎厥性既柔其平如砥因滴瀝以成象若洞澈而虛已注而匪竭歎追琢之莫加協乃有時顧堅貞而何以下漱而玉中開似冰謂雕以爲樽窪而無當疑鑿而成磴豁爾非憑然則引深邃洞觚稜諒在物而靡及非自微而不能由是異類相推於斯何甚蒙兮莫奪堅然是稟清光亂灑初熠熠以穿菱素彩頻垂每熒熒而透錦偉夫烟若方絜於焉注茲或零落以將盡竟連環

而不遺依依未通遵神泉之靡息一一將徹聽鳴玉之
遠而故可以託質悠悠于山之幽載吐潛液靜如冥搜
滴盤礴之間通茲餘潤挺剛克之際分乎至柔諒成功
之不遠庶積習之可求

第二

同前韻

楊宏貞

溜可穿石柔能陷堅因依而上下相遇悠久而貞剛失
全始則泠泠觸泓澄而或躍旣而決決窅洞達而旁穿
一道中透孤光下懸何載馳之不息終漸靡之使然觀

夫習坎能通柔虛洊至虹挂空而飲井星曳練而投地
徵老聃之說柔弱勝於剛強驗夫子之文積善由乎馴
致當其涓涓無已皓皓未通若漸巖之見拒能激射以
相攻既激盪以探奧遂深沉而鑿空下漱花浮似出桃
源之外乘流魚躍如辯丙穴之中言念其美因詳所以
石雖堅而有崖溜雖柔而不止進寸退尺常一以貫之
日往月來則就其深矣克諧潤下之道實契靈長之理
想夫經始之時人莫知之笑我者謂量力而徒爾見機

者料成功之遠而既知難而不退長引彼而注茲是能
卒獲其求何傷守柔細滴瀝以成響大逶迤而若抽在
彼一拳同玉卮之無當經乎五色狀銀漢之分流其空
可翫其義可稟庶求福之不回思進身而去甚彼以水
投石于嗟莫承摧鋒飲羽誰謂難能曷若挫銳而功著
積微而道弘妙哉斯賦之旨惟執柔而有恒

文苑英華卷三十一

欽定四庫全書

文苑英華卷三十二

宋 李昉等 編

水一

水德賦一首

水彰五色賦一首

鑿止水賦三首

止水賦二首

如石投水賦三首

水德賦

梁 洽

大哉乎茲水獨靈長以利貞分位象於八卦得柔謙於

五行混之不濁流之不足蓄恬澹以凝潤舍虛無而洞
清其近窺也若冰鮮與玉潔映曙空而內澈其遙視也
如雨罷而日晶澄遠氣於初晴德之深與上善而均美
讓之大居下流而不爭處地為泉源則江漢朝宗之義
立在天為霧露則陰陽燮理之功成辨涇渭於九流雖
衆不雜察媿妍於萬象在隱皆明亦何異翹翹邦彥濟
濟朝英作我吏部為周亞卿昔掌地官其守土也能審
今來會府其應物也以精迴廣照之能比其妙識以無

偏之志喻此持衡故得自陝以東更仰知人之鑒普天
之下皆稱如準之平則有登舟未涉處轍未停遊子隴
頭嗚咽斷腸之奏知音席上傳聞盈耳之聲儻爲廣由
中之德流潤下之情則所謂清通之一過可以濯吾纓

水彰五色賦

以渥彰明必
資乎水爲韻

善利無方莫先乎水識疑當潤色之際必取務滋之旨
黑黃蒼赤皆類其激物黼黻文章咸本而資始德既洽
於濟物色且叶於通理自得玄之又玄何謝美之爲美

于以增矐矐于以散煌煌浴飛翬於陳寶浸社土於徐
方染氏繫而衆彩繁糅績人因而品彙咸彰博我以文
不獨專於潤下用而不竭將以効其靈長原夫被物如
濡霑顏載渥狀暮山而翠疊法朝景而霞駮遠同墨氏
類素絲之屢遷尚想蜀江嘉貝錦之斯濯飾袞衣而煥
爛成繡服之歲蕤何采章之不昧一作勝由浸潤之所資
漸以化成能令素以爲絢期於敷演孰謂涅而不緇既
得色斯舉矣亦可狎而翫之不假濯於滄浪寧同資於

碧海凝瑞霞之炫燿發慶雲之光彩寫補天之績鍊石
之資必該圖應聖之祥威鳳之儀咸在佐益丹而惟其
深矣當後素而不曰白乎流濕之光允若受采之時是
須且比成人之美實同因物有孚助其言而載隨炳其
用而無必乍成藻火之文幾變素紈之匹榮光可愛初
謂出河之符備色咸宣更入夢江之筆先王所以因而
立旨諭以相成含章而其輝未著發澤而其道彌精儻
不苟於體用庶可致於文明

鑒止水賦

以澄虛納照遇象分形爲韻

呂 溫

水止矣靜之其徐物鑒矣久而益虛既一作且無情於美

惡又奚議夫親踈委質由來所期乎上善同利忘筌已

悟寧患乎至清無魚若乃迴塘月皎一作抱高岸環合泥

滓湛而一作然自沉金沙烟其不雜同道德以虛而受異

川澤唯汙是納有斐君子此焉明徵氣隨浪一作波息心

與源澄端形赴影如木從繩其表微也挂金鏡而當晝

其索隱也隔玉壺而見冰爾其色必洞澈一作激光無滉

養不蒸翦鬱之氣不激潺湲之響百丈在目千仞指掌

惡每自乎中見美實非乎外獎鑿形之始方似以身觀

身得意之間乃同求象忘象觀其下倒星漢上披煙雲

守其常而性將偶道一作合居其止所一作而物以羣分君

鑒之以平心臨下必簡臣鑒之以而一作勵節在邦必聞

妍媸無形兮惟人所召物我兼進遺一作兮水無不私一作

照廉士以之洗心二字一作至人以之觀妙豈比夫逝者

如水敵若建瓴一作流若激不舍晝夜爭輸滄溟徒乖

躁靜之理莫辨真偽之形者哉邦家以道一作邦國以賢爲止

水鑿有餘裕羣形鱗集萬景雲附一作衆象景附濫巾竊吹者

十手所一作共指研精據實者千載一遇夫如是姑自攝

其威儀亦何憂而何懼 凡一作皆集本

第二韻同前

張仲素

水可取鑿人能就諸將審己以徵實必含形而內虛其
止也靜其清也徐方湛兮而皎鏡異沔彼而淪胥符上
善之心自多弘納見無私之狀臨或躑躅資坎德之深

矣諧至人之淡如當其曉日增鮮光風未度既清冷以
爰止持烟戒以爲喻等濫觴之猶蓄何一杯之是措諒
善惡之咸觀必形影之自遇豈獨無當五色空涵衆文
伊吉凶之肇起如動靜之潛分俯而窺似神交之淡泊
默而察若靈化之絀緼且義叶養蒙道深觀竅洞虛無
以責有在清明而惟肖心不同也常稱厚貌之疑鑑之
精兮未若重泉之照辨妍媸而無失固潔著而爲妙斯
所以田巴覽之而獨悲陸雲觀之而自笑若乃芳塘始

啓白水初澄有美人兮方靚坐曲岸而情凝毫髮已分
想沉姿而映藻清華不動見浮彩之生靈是知聲有往
而必復者謂其響答水以止而能鑒者謂之冥合方取
則於川渟孰混歸於海納此亦紀人事垂正經庶在觀
身而責影豈徒品物而流形今則萬頃方臨羣容在掌
隨方圓以見意在清通而賦象苟明鑒之不遺願飭躬
而是往

第三

同前
韻

王季友

鑒於水者不在於廣大而凝在於澄渟奔流則崇山莫
辨靜息則纖芥必形故能任人倫之巨細隨物色之丹
青皆一鑒而洞達若三光之出冥因見底之清成照膽
之朗以無心而應物皆潔已而呈象如白日之輝輝無
孤蓬之振盪憑虛之狀信有妍而有媿閱實之明固無
偏而無黨若乃仙井舊滌華池既涸中無浴鳥下絕游
魚疑金鏡之湛寂若瑠璃之至虛當其來見威儀之酷
似及其去無朕迹於淪胥向使潺湲不息噴薄長住將

沃日而騰虹或因山而瀑布遭駭颺之歛起值潜虬之
交驚雖有清明之本質豈能使形影之相遇是知專而
靜可以居要明而動亦不能照斯大道之指歸豈常情
之感召得懲躁之爲誠知飾容之惟肖人觀於水既定
而後詳水鑒於人當止而爲妙照其美也非所愛照其
惡也非所憎不分明於有位不掩映於無朋諒可移性
俾居於正直豈懷鑒貌獨貴於清澄想夫煙雨初霽泥
沙不雜明者皎練止若冰合忽形來而影見類聲往而

響答在良賢而暫窺宜陋軀之愧納今者貞清特異穎
燿前聞雖萬形之森列終一鑿而區分

止水賦

以清審洞澈
涵容爲韻

劉清

開元五年登科記第十三劉廷
玉至第十七劉凝無劉清名

觀乎太古之初乾坤定列有坎方一德之大成江河四
瀆之別注仙海以環流度星橋而靡竭立體清靜舒光
朗澈觀五行以獨舉潤萬物而齊悅豈惟以善下之故
長應流行抑亦能遇坎則止以竭爲平居荒野而不動

合寒虛而自清晝則煙雲亂出夜則星象羅生若乃湖

稱青草澤若雲夢淺深濳

一作潛

渟表裏寒洞當朱陽之

夏晚遇白露之秋仲紫闕之鴻鴈飛來綠浦之蓮舟風

送既能止而利物所以歸之者衆亦有凰鳳之沼明月

之潭每澄流於庭院常不注於東南蒙寮案之玩洽渾

琴酌而相叅以遊以賞如液如涵若英賢之取則類貞

咸之是湛屈夫玉

一作宙

宇初晴風颺載寢籠碧天而似

鏡展紅霞而若錦納衆影而不遺比羣情而特甚用使

至人觀之而心察智者樂之而情審達士愛而欲臨高
節聞而願飲復乃養龜鶴藏魚龍恠石積明珠重虛以
受物謙而克從有一人兮充賦每咨歎於澗松飾清顏
而自肅希止水而今逢則知無美惡以畢鑒豈徒取乎
矯容

第二

同前韻

王泠然

嘗聞神心保正天道害盈漏卮添而復出歌器備而還
傾豈若茲水居然可名既混之而不濁又澄之而不清

時止則止時行則行峻隄防則其源見塞開汲引則其道能亨安波不動與物無爭如方圓之得性何寵辱之能驚故爲國者取象於止水使其政公平爲身者亦同於止水使其心至明至察可尚柔謙何稟思遠道則一葦能航守貧居則一瓢可飲接下流則卑以自牧鑒羣物則寬而能審誠用之而捨之在去泰而去甚水之爲德也長水之爲功也衆散成雲雨畜作潭洞浮芥則傲吏措杯種瓜則幽人抱甕無朝夕之出納有飛沉之狎

弄徒觀其深虛見底咫尺宜探千流並入萬象皆涵搖
樹影於青岸落山光於碧潭其仁可以濟物其義可以
激貪既而壅之不流蒙則未決照春物而畫屏相似映
晴空而明鏡無別雨來而圓點亂生風靜而長波自滅
任天時以開閉隨王澤而盈絕受涓滴而逾深處冰壺
而更澈書云視水青影能見形容視人行事能知吉凶
政煩則人擾水濁則魚噞夫子欲精神而不惑俾榮利
無繫於心胸比浮雲之於我觀止水而爲容兀兮若枯

木坐忘澹兮若虛舟見逢正道未遠斯言可從儻不違

疑作遺於射鮒希有便於登龍

如石投水賦

以仁義忠信公平能諫爲韻

劉闢

聖之求賢也詳明水之受物也柔順石遇柔而不阻臣
俟明而必進漢祖興兮昌言納留侯輔兮皇威振喻石
水以興詞配鹽梅而稱雋堅脆性異應廣納而來投尊
卑禮殊致精誠而取信伊水爲體既清而平猶君爲德
既貞而明石豈自投假海納之弘量臣非苟進由天聽

而察誠用率於有類將感於無情虛而受者其理遠舍
而容者其道行何幽邃之能間奚渺瀰之足驚夫國之
勃興必多賢智繼九臣之跡膺三傑之義煥發英藻呈
龍章與鳳姿敬宣嘉猷謂嶽生而天賜豈不由山有巨
石水有通津忽擊流以澎湃俄答響於奔淪雖源深流
長乃入無不至而體柔處潤則託有所因移他山之貞
質依上善之全仁夫水石之奧旨與君臣之等倫今天
子端居穆清時和海晏念投石之契爰求秉鈞思歲闕

之規載徵驟諫由是如石之義啓投水之情通彼以誠
應我亦符同懸天爵之榮獲斯人瑞尊五嶽之禮視乎
上公恆啓沃以爲志方清明而在躬比石固業欽賢績
功儻或水不周容石乃無由寓質君不虛己臣則曷能
推忠可以垂誠訓可以流德風則知聖既作兮政惟恆
石既投兮賢必澄敢獻良哉之詠願揚美於廉能

第二

以聖獎忠直從
諫如流爲韻

盧肇

石比臣心水猶君德誠見投而不阻如從諫而無極蓋

所以作仁聖思正直清逾萬頃能容落落之姿操或一
拳以透沉沉之色惟我聖后啓乎宸聰每以淡然之德
能取確爾之功言乎水也逾漢祖之虛受稱乎石也遇
留侯之盡忠是以王事竭誠羣臣報政具懷鑿鑿之美
允納洋洋之聖君心潤下已覃滂沛之恩臣志補天願
表堅貞之性故得朝廷肅穆上下交慶小伊傅以輸忠
配唐虞而比盛者也當其欲進嘉謀心懷隱憂思衮職
而有補隨諫鼓以來投於是咸趨丹陛若蹈洪流且推

誠而上達亦虛心而下求既乃契皇情承天獎介然允
臻乎浹洽渙若盡納其忠謹一言初進開龍顏而似激
圓波萬國皆聞入宸心而若流清響乃知窺日月之光
有虧必諫震雷霆之怒有諫必從雖磊落以難進乃廣
大而見容既無悔以無尤子產徒言於狎水那將恐而
將懼韓非奚患於櫻龍且夫瓊瑤爲報而匪珍夜光處
暗而多患未若我喻水於盛德比投於納諫允當上善
之求勿謂下流之訕遂用握金鏡臨玉除忠言得進以

無隱聖慮每徵於往初如是則祥符出惠澤舒將無事而無諫見寰瀛之晏如

第三

同前韻

白敏中

石明臣節水喻聖聰順投既因於納諫虛受必俟乎輸忠從以讜言出清規而有中類夫貞節入碧浪以無窮爰自人謀式彰天獎言必在乎能發道奚疑於虛往自懷從善聞蹇蹇於股肱何異臨川運磷磷於指掌理既符於水石事且契於雲龍佇啓心而是替在虛已而能

容石投水而誠資手敏臣佐君而詎得面從當手敏則
水不傷清匪面從則君能立政嘉獻替而無爽幸遭逢
而有慶致至堅於玄奧象以得賢受可轉於清流因之
啓聖所以垂衣廣納側席深居言之者何嘗率爾聞之
者足以啓予攻玉之形隨帝心之沃若補天之質應王
澤之濡如既而流謗靡行沉幾自得當持重而無撓冀
臨深而不惑逆於耳而順於心黜其邪而褒其直用礪
金於睿鑒渙汗潛通舉韞玉於恩波津涯莫測於是宣

教化罷畋遊開直道務旁求發揮諤諤之明節會合洋
洋之聖謀石以貞堅本無疑於虛擲水惟柔順安有阻
於暗投夫然則臣心磊落而上達君德汪洋而下流况
乎舟楫之道大行不侮不慢藥石之言盡入何憂何患
當道泰而人悅固河清而海晏彼漢高之用留侯未若
吾皇之納諫

文苑英華卷三十二

欽定四庫全書

文苑英華卷三十三

宋 李昉等 編

水二

觀秋水賦一首

空水共澄鮮賦一首

水鏡賦三首

水木有本源賦一首

水輪賦一首

曲水杯賦一首

滄浪濯纓賦一首

水始冰賦一首

觀秋水賦

尹 程

采

疑作
乘

秋日之遊豫縱竒觀於長川惟秋水之清泚宗

大壑而潺湲波浩蕩而不極影澄澈而彌天波沉馬色
類真人之雲度岸迷牛影疑織女之河邊柳浸影而如
卧萍隨流而似牽鳧帶藻而聲澁魚亂流而水圓晴霞
晚鋪如漢江之濯錦夜月初上若織鈎之映泉乃與斷
金之好連璧之友矜壯歲之紅顏怯衰年之白首効淡
水之密契就河濱而置酒惜素節之凋荷歎嚴風之入
柳况夫澄淡逶迤涵空寫淨符老君之上善同至人之

不競處下不辭其垢濁攻堅豈難乎流盛星光夜照如
臨剖蚌之珠菱影朝開似照盤龍之鏡爾乃長波瀕洞
洪濤汎溢晴天淨而空鮮夏雲臨而峰出照鄒忌之叢
貌鑒陸雲之笑疾遂有感於莊篇託微言於拙筆

空水共澄鮮賦

張嘉貞

空之爲象也本乎天水之爲德也本乎泉上善之人方
其性真化之客愛其玄清虛而隱性含受而無偏因高
下而臨照故能共於澄鮮誠大明而盡善實和光如可

憐爾其皎潔清泚空色懸於水底分明昭曠水光積於
空上玲瓏晶晶液液託九霄如染翠澈千里而含
碧微風共息含晴影而湛然兩日俱生弔長輝而相射
表裏如一容象難尋含泳游鱗若迴陵而上出睽翩度
鳥疑戲沙之下沉爲當物將類於迴覆爲是人自惑於
闕臨竟未能縷列於疑似分別於空水玄之又玄美之
逾美

水鏡賦

利濟者水涵虛者鏡懷朗鑑遇物無心處下流通而不
競對清流則汎濫長游開寶匣則蟠螭孤映汾澮所及
泯衆惡而無私銓衡不遺鑒羣才而必正清灼其味堅
貞其質六氣咸用彼得於終亨五材不憊乃取其初吉
深則不竭貞能象物浮錦纜而花生映瑤臺而月出若
然者體不自有故受之於金功不自居乃推之於坎昭
昭神遇必盡其妍媸泛泛隨流豈懷於舒慘清必見底
明恒照膽壅之則止寧有謝於屯蒙用之則行竟無情

於窺鑒臨萬象而皆見總百川而俱會隱瑞鵲於光中
泛靈查於天外混之不濁含靜質而終潔覆之則昏用
明道而若昧功雖一致理或殊調乘桴浮海從我者豈測
其深賦蒙求徵無欲者以觀其妙納晴天而兩日交麗
因紅粉而雙容俱笑既不憚於惠風亦何疲於屢照加
以向日冰靜澄流玉潔聲名未著覽鶴髮而魂驚功業
後時仰龍門而心絕幸君子之惠鑒疑庶流同而派別

第二

鄭繇

夫有名之域有象之中惟水能淨惟鏡能空水則無心而皎澈鏡則照膽而幽通遇物斯應匪我求蒙爾其決之則流盈而不闕泛金碧而色潤開玉匣而光發其清也不同和風其鑒也不同朗月爾乃雲收白日粉拭紅塵拂菱葉而交映抱菱花而獨春直注千里旁通四隣成美惡之玄鑒

原闕十字
一字

惜容輝之

易晚歎功名之難續况復影圓鳳沼聲激龍門可驚飛於神鵲可搖動於靈鯤同大道之自然合重玄之衆妙

冰潭洞達石崖含耀亦由裴楷清通王戎簡要知之疑
類之疑疑意忘疲於屢照

第三

賈魯

原夫水能利物鏡以含虛泛鷗攸徃盤龍是居蘊靈長
而遠蓄懸洞鑒而藏諸其止水也體靜而舒惠風拂而
逾益明月來而不如清則徹底蒙紛濯洗朗亦難雜逢
昏可合則有分流學海挂影仙臺映冰壺而洞徹連錦
帳以徘徊是用益澄流品取鑒羣材涸鮒思躍飛鷄自

猜挹餘波而得潤雖屢照而常開惟茲道也可允孚惟
茲務也可長守所以息僥倖之心疑杜讒慝之口將座
銘之不若雖撲滿而何有士或湮淪時多苦辛願濯纓
而未暇思照膽而無因空匪材而濫挹願將此以書紳

水木有本源賦

高 郢

木造天水窮玄森森擢千丈之秀汪汪澄萬頃之鮮散
而成衆木䟽而爲百川杞梓之材備矣江湖之量存焉
竊聞源長而下流不竭未見本盛而枝葉先顛志士託

以垂陰無假惡木渴者飲而滿腹何求盜泉故樹善於
人人懷則甘棠不朽汎愛於衆衆湊則德水長懸方將
成不言之蹊廣利涉之路俾出幽之鳥仰喬幹而能遷
未濟之人因餘波而可渡烏豈木之所擇非擇木而不
栖人奚水之足鑿亦鑿人而取喻徒聞其移橙渡北不
能苞貢於王國導漾之東是以昭回於昊穹木誠戀於
南枝常得地而專美水豈忘於西土乃陵雲而獨崇用
不用也非結根之有異高莫高兮將聞源而實同菖蒲

猶能庇其本江漢所以朝其宗固宜大樹蔭庥而千牛
可蔽洪河浸潤而九里旁通寧效有喬而不可休息於
其下至廣而不可游泳於其中者哉則有青青弱幹獨
秀未立涓涓細流徐清可挹植翰苑以蕭散赴龍門而
驚急企樛木之逮下望恩波之流濕

水輪賦

以汲引之道成
於運輪爲韻

陳章

水能利物輪乃曲成升降滿農夫之用低迴隨匠氏之
程始崩騰以電散俄宛轉以風生雖破浪於川湄善行

無跡既幹流於浪面終夜有聲觀夫斷木而爲憑河而
引箭馳可得而滴漑輻輳必循乎規準何先何後互興
而自契心期不疾不徐迭用而寧因手敏信勞機於出
沒惟與日而推移殊轆轤以致功就其深矣鄙桔槔之
煩力使自趨之轉轂諒由乎順動盈科每悅於柔隨遠
望蹄涔詎有朱殷之色挹茲鱗起終無塗附之期作霖
或自於斯干流濕更彰乎就燥回環潤乎嘉穀洊至踰
於行潦鈎深致遠沿洄而可使在山積少之多灌輸而

各由其道爾其揚清激濁吐故納新輾桃花之活活搖
杏葉之鱗鱗一勺每勞於濡軌三材必賴於工人浴海
上之朝光升如日御泛江中之夜影重似月輪常虛受
以載沉表能圓於獨運低迴而涯岸非阻委曲而農桑
是訓惠可周於地利空霑負郭之田材足任於天津多
寄臨川之郡池陂無漉畎澮既渚用能務實勢欲陵虛
磬折而下隨茲彼持盈而上善依於當浸稻之時寧非
沃壤映生蒲之處相類安車異矣哉俯此溝塍潤於原

隰成形必仰乎膏雨屈已且安乎卑濕苟量遠大之功
庶無慙於甕汲

曲水杯賦

以曲水同醉樂
如之何爲韻

陸環

麗景云暮歡情柰何水散循環之勢杯浮一勺之多樽
俎必呈反本源於杯飲歌鐘合奏起觴飲於流波爾其
洋溢折旋從容娛樂觀滴瀝以繚繞將灌注而酬酢袒
裘解帶笑沉醉以山頽求日暄風期竭歡於水涸狎翫
未已迴環不窮方醴泉之自異念酒池而莫同滿座醜

顏盡染桃花之水綠隄芳草尚遺蒲杓之風是以布令
如流娛情忽起已控清流而引滿遂用銷憂而飾喜且
異載沉而載浮寧同以水而濟水情符汎愛誤比投醪
之時曲辨靈長足見濫觴之始爾乃負舟無力載酒何
如波卷每觀其泛蟻鈎深自致乎無魚成禮交歡寧酒
流而生禍效竒行恠豈杯度以憑虛所以上下隨波方
圓在器念縮茅而自別比浮芥而亦異獻壽終歎於流
川如澠倍符於此地已傾壺而揚解默爾無諠方枕麴

而藉糟塊然復醉想夫飲流畢會倒載爲期乘波而瀟
瀟迴疾入曲而悠悠轉遲投轄留賓自有清澄之色汗
樽就飲飜疑樸畧之時分巡而小大殊矣遠座而左右
流之時也酒且以闌景云暮促愜蘭亭之嘉會散陽春
之麗曲終已時移但山高而水綠

滄浪濯纓賦

以君子潔身
及時爲韻

滄浪之水兮伊楚之濱汗漫蕩漾兮清泠淪淪控三湘
之淺浪從大別而派分澄澹清景離披曉雲彼美人兮

何其獨商歌以思君覩斯水之洞澈惡吾纓之垢氛將
濯其纓亦潔其已逐臣逋客漁翁樵子吟刈楚以激昂
詠伐檀而筮仕哀靈均之濯足笑許由之洗耳載泛載
浮曷云其已泊夫白日始晞青天收潦千尋湛而見底
萬里淨而猶掃漾磷磷之淺沙蕩靡靡之纖草縈紆浦
漱邈迤洲島興既遠兮情亦閒纓載濯兮身亦澡于彼
濯矣伊水之濱于彼澡矣君子之身絛我滓穢去我埃
塵且潔淨以精微又肆志而王神孰與夫澤畔憔悴空

見悲於楚客心之憂矣匪興刺於詩人已焉哉士生世
兮患於不立朝聞夕死道之所急偶滄浪之且清豈坎
窞之能習易載出處詩稱維繫歲冉冉而不留雖追悔
而何及一有辭字曰滄浪之水兮徵楚詞臨清漪兮應昌期
濯吾纓兮有所思幸我生兮及明時進德脩業兮已矣
拔茅彙征兮良在茲

水始冰賦

以律報司寒水
因水結爲韻

潤下之性有時可凝暑歸寒集陽閉陰升吹寒風之遠

派蹙凍雨而成冰俾巨海以息浪胡涓波之足徵北陸
陰涸寒泉井冽天吳外搏靈昏自潔含貞抱虛旣瑩且
澈斷流而稜稜劍威照日而片片霜切馭坳曲陵湫穴
蒼山甕石大冶流鐵圓光而蚌珠可掬朝涉而馬蹄可
折既否隔於風雲亦秘藏於魚鱉爾乃命海若戒馮夷
連燄絕於火井俾梁成於水湄乘險無替旬日不衰若
擁輕絮如積素絲秋令雖終尚占庚辛之色嚴風更肅
將奉玄冥之司其爲水也則陷其爲冰也則履畜成比

王之壺散作流謙之水柔性是著仙顏是比方稽化而
轉疑蓋不知其所以夫其瀑布流湍迸射交攢簷溜承
綆垂空凍乾微波煙幕大壑雲漫滴貫珠而呈脆排層
巖而召寒至於六尺表竒百丈涵奧鼠北方而可規蠶
東夏而稟操堅貞應運道光武而堪竒孝德幽通獻頰
鯉以爲報此下不見
因字官韻始冰之初立冬之日將鑿井望納
秩刷室應候司管調律溫泉殊沼夏蟲異術閭闔門靜
瑯琊井溢當腹堅而將藏候朝陽而迺出

文苑英華卷三十三